

第九所學典籍。（中略）

第十傳持相承。（中略）

至日域戒律弘通之相者。根源由來其事大矣。（中略）

天寶十二年癸巳（當日本天平勝寶五年。）十一月十五日。乘船離唐。其相隨之弟子。揚州白唐寺僧法進。泉州超功寺僧曇靜。台州開元寺僧思託。揚州興雲寺義靜。衢州靈耀寺法載。寶州開元寺僧法成等一十四人。藤州通善寺尼智首等三人。揚州優婆塞潘仙童。胡國人安如寶。崑崙國人軍法力。瞻波國人善聽。都二十四人。浮海發向此日本國。遂以天平勝寶五年癸巳十二月二十日着日本地。同六年甲午（當唐第六主玄宗皇帝天寶十三年。）二月四日入京。入京已前數日之間。僧衆俗衆慰喻迎接。遂引入東大寺安置。（中略）

鑑真大師報齡十八從道岸律師受菩薩戒。岸乃南山律師弟子也。年二十一從弘景律師受具足戒。隨融濟律師學律鈔等。弘景融濟竝南山弟子也。從義威遠智全修惠榮大亮五英學礪律疏。此五人并滿意律弟子也。大和尚專弘相部南山律宗。兼達天台法華教觀。五乘洞括三藏通曉內外兼綜大小包博。護法感通神變化導。講經律論訓導俗人。響振四遠德流八紘。九州崇爲受戒和上。講律及疏各四十遍。講敷事鈔總七十遍。輕重羯磨講各十遍。前後度人四萬有餘。三十五人特拔羣倫。各建一方弘通像教。於日本國結三戒壇。一東大寺戒壇。二西國觀世音寺戒壇。三東國藥師寺戒壇。竝蒙天恩行受戒事。東大寺戒壇十人受戒。兩國戒壇五人受戒。唐招提寺亦建戒壇。東西兩京授戒無間。來朝之後總經十年。初之五年住東大寺戒壇院。唐禪院即常居住處也。後之五年居唐招提寺。隨從弟子中呈名後代者。仁韓大德。法進大僧都。曇靜大德。法顯大德。思託大德。義靜大德。智威大德。法載大德。法成大德。靈曜大德。懷謙大德。此十一人於唐受具。如寶少僧都。惠雲律師。惠良大德。惠達大德。惠常大德。惠喜大德此之六人竝亦唐人。而於此國受具足戒。沙彌道欽是亦唐人。此十七人隨從來朝。始終隨逐助師化儀。大和尚天平寶字七年癸卯（當大唐第八主代宗皇帝廣德元年癸卯。）五月六日。端坐遷化。春秋七十有七。（下略）